



天然的四秀仔

向時的農業社會物資較欠缺，三頓若有通食就真萬幸矣，做囡仔的哪敢數想食啥物四秀仔？

干干仔阮遮的囡仔疋，人閒就想欲揣物件來食。學校福利社賣的糖含仔、王梨心、樣仔乾攏愛用箍箍才買會著。阮遮的枵鬼囡仔是橐袋仔袋磅子，哪有通買來食？只好佇放學的時，相看路邊有生烏甜仔無？烏甜仔，華語講『龍葵』。伊的子若熟到在，規粒就會變茄仔色，若莫去食著生的，抑是人拄澍殺草劑、澍藥仔的，有通啖糝較贏佇咧流喙瀾。

有當時仔阿兄會弄我去車頭遐挽「咖啡」。紅紅的咖啡甜甜，內底有真濟細細粒仔的子，鼻起來若蜜咧，有夠好食，恰咱這陣啖的苦 teh-teh 的咖啡無全。哪會叫伊「咖啡」咧？可能是個熟的時，規粒攏紅紅的緣故。大漢了後，才知影伊是西印度櫻桃屬的「南美假櫻桃」，恰咖啡一點仔關係都無。

細漢的時槌槌，定定予阿兄創治。有一擺伊弄我去廟口耍，看著一橫足大橫的樹仔，頂懸有生足濟紅紅的「咖啡」，伊講欲挽予我食，三兩下手就跼去樹仔頂，擲幾若粒落來予我。一窒落喙空，俺娘喂，哪會澍 kinn-kuāinn？這是啥物「咖啡」，有夠歹食！路尾才知影，彼橫是榕仔，根本就毋是「咖啡」。

阿母定定罵阮：「烏白挽、烏白食，也毋驚會予人毒死！」毋過若是綴伊去田裡割田岸仔草，伊嘛是會挽路邊生的山葡萄予阮食。山葡萄若有熟，皮會變做柑仔色，內底有一粒一粒軟軟白白閣包烏子的肉。有一擺去朋友兜，看著個埕裡種的時計果開的花，恰細漢阿母講的山葡萄真成，原來時計果就是華語講的『百香果』，到彼陣才知影山葡萄毋是葡萄！

阮丈公佇街裡有開一間漢藥店，逐工便若放學行對遐過，較好喙咧行人去共叫一聲：「丈公！」伊就會捎幾片仔甘草予阮含，這個時陣，阮就規喙攏是甘甜的喙瀾，予阮感覺有夠幸福的！

作者：林美麗

☆詞彙學習☆

【四秀仔】sì-siù-á：零食、零嘴。

【向時】hiàng-sî：從前、昔日。

【枵鬼囡仔】iau-kuí gín-á：小餓鬼、貪吃的小孩。

【橐袋仔袋磅子】lak-tē-á tē pōng-tsí：口袋裡裝的是砵碼，看來很重，其實不是錢。形容人窮。

【澍】tshū：噴。液體由小孔洞噴射而出。

【啖糝】tām-sám：解饞、淺嚐，為消遣用。

【槌槌】thuî-thuî：傻頭傻腦、傻乎乎。糊塗傻氣，笨頭笨腦，什麼都不清楚的樣子。

【創治】tshòng-tī：捉弄、欺負。

【喙空】tshuì-khang：口腔、嘴巴。

【捎】sa：動作粗魯，隨便就拿。